

**He Whakatairanga i ngā
Taonga Tuku Iho
NZCL 5 Mahere Hopu
Whakaahua**

Kua whakaputaina tēnei rauemi matihiko e Toi o Tāmaki rāua ko Te Rūnanga Hautū Mātauranga Toi o Aotearoa (ANZAAE), 2022. Manatārua: mahi toi © e ai ki ngā kupu tāpiri; tuhinga © e ai ki ngā kupu tāpiri, nā Toi o Tāmaki rānei.

Kaupapa Mahere
Subject Overview:

He Whakatairanga i ngā Taonga Tuku Iho
Mahere Hopu Whakaahua

Te Taumata i Te
Marautanga o Aotearoa
NZ Curriculum Level:

5

Ngā Pūkenga Matua
Key Competencies:

- ✓ He whakahaere whaiaro
- ✓ He whakawhanaunga
- Te whai wāhi me te whakatakoto whakaaro
- ✓ He whakaaro
- ✓ He whakamahi i te reo, i te tohu, i te tuhinga

Wheako Whakaakoako
In this unit you are learning:

I tēnei wāhanga ko tā te ākongā he tōmene i ngā taonga ahurea, i ngā taonga tuku iho, i te whakapapa, i te hītori. Ka pakari haere tōna mōhiotanga ā-ringa e pā ana ki ngā tikanga tango whakaahua, ka hanga ai i tētahi mahi toi e whakakite nei i tāna ako i ngā mahi a ngā ringa toi nō Aotearoa, tae atu ki a Aimee Ratana rāua ko Fiona Pardington.

Ngā Whāinga Paetae:
Achievement Objective(s):

- ✓ **UC – Kia Mārama ki ngā Toi Ataata e ai ki tōna Horopaki**
 - He aha te pūtake o ngā mea me ngā ataata nō ngā ahurea o mua, o nāianei hoki, ka tautohu ai ngā horopaki i hangaia ai, i mātākihia ai, i matapoporetia ai.
- ✓ **PK – He Whakawhanake i te Mātauranga Ā-Ringa**
 - Whakamātauria ētahi tikanga mahi-toi; whakamahia ngā rauemi me ngā hātepe hei whakaatu i te mōhiotanga ki ngā āhuatanga toi me ngā mātāpono toi.
- ✓ **DI– He Whakawhanake i te Ariā**
 - Whakawhanakehia, whakamātauria anō ngā ariā ataata hei urupare ki ētahi whāinga, ētahi tirohanga, te pohewatanga hoki, e ai ki te rangahau o ngā mahi a ngā ringa toi.
- ✓ **CI- Whakawhiti Kōrero, Kimi Tikanga**
 - Whakaahuatia ngā kōrero e pā ana ki ā rātou mea, ki ā rātou ata ake ki ngā ata a ētahi atu, hoki.

Horopaki me ngā Uara
Context and Values:

He akoranga horopaki:

- ✓ Te whai mārama, te kaingākaunui ki ngā taonga tuku iho
- ✓ Te hono ki te whakapapa e hāngai ana
- ✓ Te whai whakaaro mō te whakatauhoko, mō te pāhao, mō te mana whakairo hinengaro e pā ana ki te taonga

Ngā Uara:

- Te whakahoutanga, te pakirehua, te hiamōhio
- Rerenga Kētanga
- ✓ Te pono me te whakaute
- ✓ Te mana taurite
- Toitū te hauropi
- ✓ Te Hapori me te whai wāhi
- ✓ Te Kounga

Rauemi Toi
Materials:

Pukapuka Mahi
Kāmera

Rauemi, Putunga Kōrero
(pukapuka, rauemi ipurangi)
Resources and Material
(books, websites, etc.):

Ka taea te whakamahi He Whakatairanga i ngā Taonga Tuku Iho – He Rauemi Mātauranga Hei Tiki, hei rauemi ako.

- [Toi Tū Toi Ora: Toi Māori o Nāianeī](#), Auckland Art Gallery Toi o Tāmaki
- [‘Concepts to understand’](#), New Zealand Intellectual Property Office
- [‘A tiki tour of our heritage’](#), New Zealand Herald
- [‘Tiki: more than decor – a symbol’](#), New Zealand Art Print News
- [Photography Analysis Resource Sheet](#), Arts Online Te Hāpori o Ngā Toi
- [‘Aimee Ratana’](#), Auckland Art Gallery Toi o Tāmaki
- [‘Cultural analysis of Emotiki app and why it could be offensive’](#),
Karaitiana Taiuru
- [‘Hei Tiki: He Whakamārama Hōu’](#) (Tuhinga roa tāhū paerua),
Dougal Rex Austin
- [Te Hei Tiki: An Enduring Treasure in a Cultural Continuum](#)
(he whārangi tauira), Dougal Austin
- [Plastic Māori](#), The Dowse Art Museum
- [‘Synthetic/Authentic? Plastic Maori’](#), The Dowse Art Museum
- [‘Plastic Māori: Ngā tuakiri hōu – new Māori identities’](#), Te Ara
- [‘Week 2 Task: Wayne Youle: Often Liked, Occasionally Beaten’](#),
KDOESCONVERSATION
- [‘Conversations In Creative Cultures’](#), Grace Scott-Hewitt

Te Tiriti o Waitangi The Treaty of Waitangi:

E kī ana te wāhanga tuarua o Te Tiriti o Waitangi 'Ko te Kuini o Ingarangi, ka whakarite, ka whakaae ki ngā rangatira, ki ngā hapū, ki ngā tāngata katoa o Niu Tirenī, te tino rangatiratanga o ō rātou whenua, ō rātou kāinga **me ō rātou taonga katoa**'. E ai ki ngā tāpaetanga ki te Taraipiunara o Waitangi e pā ana ki te reo Māori, ko te 'taonga' **he āhuetanga katoa o ngā rawa o te iwi, he mea kikokiko, he mea kikokore, he wāhi tapu, he kōrero o nehe, he whakapapa.** [Te Tiriti o Waitangi | The Treaty of Waitangi](#)', Te Hītori o Aotearoa.

Ko te taonga (he taoka ki a Kāi Tahu) he matahāpo ki te Māori, tae atu ki te reo, ki ngā tikanga tuku iho.

Ko te hei tiki he tauria e whakaatu nei i te takahia o te Tiriti; i ngā tekau tau 1930, ka whakaputaina ngā hei tiki kirihou mano whāioio hei hoko atu ki ngā tūruhi, ka takahia te mana o te hei tiki hei taonga. Ka whakatenatenahia te ākongā ki te ruku i ngā kaupapa purenga ihomatua, i te nopenope ahurea, i te whakaora mana, i te poipoi taonga whānau.

Ka whakatenatenahia te ākongā ki te āta huritao i te hira o ngā rauemi ahurea, ki te tangata, ki te iwi whānui. Ka titiro ki te hei tiki hei mahi tuatahi, ā, ka huri ai ki ā rātou whakaahua mō ngā taonga whānau (hei tauria ko ngā takapapa kātene i tuia ai e te kuia, ko te kohinga tītaora o te whaea nō tōna wā huri haere i te ao, ko ngā taputapu rino a Pāpā i tukuna iho e tōna koroua, ko te kohinga mea tākaro ngohengohe o te tuahine, ko te kohinga pane kuini o te koroua, ko te kohinga kōpae puoru ABBA o Māmā.) Mā te rangahau i te hei tiki o mua me te hei tiki o nāianei, e mārāma haere ai te ākongā ki tēnei mea te taonga. Mā ngā mahi a Aimee Ratana e akohia ai ngā āhuetanga o te aponga, o te takahi mana, o te pāhao, o te whakatauhoko i ngā taonga ahurea. Mā ngā tauria o tēnā ringa toi, o tēnā ringa toi, me te tātari i ngā ariā o ā rātou mahi, e mārāma haere ai te ākongā ki aua tūmomo kaupapa. Mā reira e pakari haere ai te whakaaro o te akonga e pā ana ki ngā mea e noho kahurangi nei ki a ia, ki tōna whānau hoki, ka mutu ka whakaaro ake ki te hira o aua taonga tuku iho.

**Ngā Pūkenga Ako Matua /
Ngā Pūkenga Whakawhiti
Key Learning Competencies/
Transferable Skills:**

Kei te whakaaro:

Te ākongā mō te take e whakamahia ai ngā tikanga, ā, mā ēhea tikanga e puta ai te hua e hiahia ana. Ka mahi ana i te toi, ka pakari haere te whakaaro me te reo matatini o te ākongā e whakawhiti whakaaro ana, e tātari ana i te kaupapa o taua toi. Ko tā te hanga mahi toi he whakaara i te whakaaro, i te pakirehua, i te huritao, i te tātari, i te whakatau, i te hanga auaha.

He whakawhanaunga:

Mā te mahitahi toi, mā te whakawhiti whakaaro, mā te mōhio ki te horopaki pāpori kei muri i te mahi a te ringa toi, e kitea ai te whakawhanaungatanga i roto i te toi ataata.

Te whakahaere whaiaro:

Ka mahi toi hei whakaputa whakaaro, hei urupare rānei ki tētahi kaupapa, ki tētahi take pāpori, me mātua mōhio te ākongā ki te horopaki pūtaka, ki te horopaki o taua mahi, hoki. Ko te whakahaere whaiaro he wāhanga nui – ko te mārama ki te hira o tōna mōhioanga ake, ko te mārama ki tōna tirohanga e tāraihia ana e tōna horopaki ake, e tōna wheako, he āhuatanga motuhake.

He whai wāhi, he whakatakoto whakaaro:

Ka mōhio te ākongā ki te wāhanga nui o te horopaki i roto i te mahi toi, ka mārama ai ia ki ngā tikanga toi. Ka mahi ana te ākongā i te mahi toi, ko tāna he whai wāhi, he whakatakoto whakaaro ki te kaupapa toi whānui tonu.

He whakamahi i te reo, i te tohu, i te tuhinga:

Ka whakamahi te ākongā i te reo, i te tohu, i te tuhinga, i roto i tāna mahi toi. Ka mārama ia ki te reo motuhake o tēnā pekanga toi, o tēnā pekanga toi, i a ia e whakamahi ana i ngā ariā me te mātauranga e pā ana ki te hātepe mahi toi.

**Ngā Hononga ki ērā
Atu Wāhanga Ako:
Cross-Curriculum Links**

Te Reo Māori / English:

Rapua ngā hononga mā te tātari whakaaro kei roto i te tuhinga, kei waenganui i ngā tuhinga huhua. Tēnā pea he nui atu i te tikanga kotahi kei roto i te tuhinga.

He Hangarau:

He whakaputa hua, he arotake. Tātarihia te hua o tāna mahi, tā tētahi atu hoki, hei whakawhanake i ngā whakaaro e ahu ana ki te hua whaitake. Whakahaerehia te whakatauiria me te arotake tōtika e aro atu ai ki te whakahoki kōrero a te hunga whaipānga matua, ki te whakamātauranga i roto i ngā horopaki kikokiko, i ngā horopaki pāpori. Whakamahia te mōhioanga e puta ai hei kōwhiri, hei whakawhanake i te hua e whakatutuki ai i ngā paearu. Arotakehia te hua whakamutunga i runga i tōna hāngaitanga ki te whāinga.

Pūtaiao pāpori:

Te tuakiri ā-motu/te kōrero ā-motu me Te Tiriti o Waitangi.

He pūkenga raka:

Te aumangea, te whakapātaritari i te pōhēhētanga, te rangahau, te whakawā, te hīraurau, te tautoko i tētahi atu ki te whakaputa hua auaha.

Momo Whakaako**Teaching and Learning Plan:****Putanga ako****Learning intentions:****Mai i (mōhiotanga o mua):**

Kua oti kē i te ākongā ngā mahi tuhi pikitia, toirau, mātātuhi, te tiroiro i ngā kaupapa o te wā, ako ki te tuhi pikitia i runga i te pūkenga mātakitaki, he whakamahi i te rawatoi mākū, i te rawatoi maroke.

Ki (putanga ako)

- Ka whakapakari i ōna pūkenga me tōna māramatanga ki ngā tikanga e pā ana ki te tango whakaahua.
- Mā te aro atu ki ngā kahurangi a tōna whānau, e rangatira ai aua mea, aua tikanga o te whānau, he mea kawē e te tango whakaahua.
- Ka ako te ākongā ki te āheinga o te ringa toi ki te whakarangatira, ki te whakatakē rānei i te ahurea, he mea kawē e te whakamahi mea.
- Ka ako te ākongā i te mana hei taonga o te hei tiki.

Aromatawai –**Evidence of success****He aromatawai hei tautoko i te ako:**

He aromatawai arataki i te pukapuka mahi a te ākongā tae atu ki te:

- Tātari mahi toi (UC, CI/DI)
- Ohia manomano
- Rangahau i ngā tauira ringa toi, i te hei tiki o mua, o nāiane hoki.
- He whakawhanake i ngā ariā mā te rau whakapā whakaahua (PK/DI) e tiroiro ai i ngā huarahi e toru, maha ake rānei: te tūrama, te hanga, ngā tikanga whakaahua

*Ka whakahoki kōrero āwhina

He Taunaki Ako:

He aromatawai whakakapi i ngā mahi toi whakamutunga a te ākongā tae atu ki te:

- Whakaahua, raupapa whakaahua rānei hei whakaatuatu (CI/DI/PK) mō tōna taonga ake.

*He māka ōkawa, he kōrero whakahoki

Te Raupapa Ako
Teaching and
Learning Sequence

He Ngohe (tae atu ki ngā hononga ki NZC):

1. He Rangahau:

Te mana ahurea o te hei tiki i Aotearoa. Tirohia te tītohunga ata. Wānangahia te whakapapa o te hei tiki, ngā kōrero o nehe e hāngai ana ki a ia. Mā te ākongā e tiro tiro ngā āhuatanga e pā ana ki te whakatauhoko, ki te pāhao, i te hei tiki.

Wānangahia te mana whakairo hinengaro, o te whakaputa hei tiki kirihou mano whāioio 'mā te tūruhi', me te pānga ki ngā uara o te Māori, arā ki te tapu me te noa.

Tirohia te tuhinga Elevated Heirlooms – Selected Sources hei whakaū i tō māramatanga ki te mana ahurea o te hei tiki.

He rauemi pai te tītohunga hei tiki, hei tautoko i ngā mahi o tēnei wāhanga.

2. He tātari whakaahua:

Mā te titiro ki tā Aimee Ratana, *MMVA_IMG: 14, 2005* me te *Hei Tiki 2, 2005*, e tātari ai te ākongā i ngā tikanga me ngā ariā matua mō te whakaahua toka.

Ka mārama haere te ākongā ki ngā rautaki mahi a te ringa toi, ki āna kaupapa, ā, ka whakatairitehia (UC, PK, DI, CI). Mā te aha e whakahokia ai te mana ahurea o te hei tiki, e ngā whakaahua a Ratana?

3. He Ohia Manomano:

Ko tā te ākongā he whakarite rārangi taonga whānau e heke haere nei te mana hei taonga, i runga i te whakamahi auau rānei, i te pāhao rānei. He aha ngā kōrero mō te whānau kei roto i aua taonga? Tēnā pea ko ngā takapapa kātene i tuia ai e te kuia, ko te kohinga tītaora o te whaea nō tōna wā huri haere i te ao, ko ngā taputapu rino a Pāpā i tukuna iho e tōna koroua, aha atu, aha atu. Ka pēhea ngā mea e whakaatu ai i ngā āhuatanga motuhake o te whānau. Ko wai te kaitiaki o aua taonga? Ka whakaetia te hopu whakaahua? Ka pēhea te tūrama, te whakariterite i te hanga o te whakaahua? Me aha hei āwhina i te ākongā? Ka whai i te tauira o ēhea ringa toi hei whakarite i te hanga pai, i te tūrama pai, hei whakatutuki i ngā tikanga whakaahua?

4. Te hopu whakaahua tuatahi:

Ka hopukia e te ākongā ngā whakaahua 40 mō āna mea; he ahunga huhua, he whakarōpū mea huhua. Whakaarohia te ahunga o te titiro, ngā tauira ringa toi, te kano, te tūrama, te arotahi, te rohe ngangahu, te tāparepare, te ture hautoru, te hanga rārangi ārahi – te rārangi, te āhua, te hanga, te kakano, te nui, te hōhonu.

5. He whakawhanake ariā:

Ka wānanga kōrua ko te ākongā i te hopu whakaahua tuatahi, ka kōwhiria ngā whakaahua pai rawa. Kua mahue i a ia ētahi koki tirohanga? He whakaaro anō hei huritao? Ko te tikanga ko tā ngā paearu whakawā, he whakaatu i te pai o te mōhiotanga a te ākongā ki ngā āhuatanga me ngā tikanga hopu whakaahua. Ka tuhi tīpoka te ākongā mō āna whakaahua haratau e whakaatu ana ka pēhea te whakapai ake kia kitea paitia ngā tikanga hopu whakaahua. Me tohutoro i:

- Ngā āhuatanga ōkawa – te rārangi, te āhua, te horopaki, te kano, te hā, te hanga, te papatipu, te whakaata, te tauira
- Ngā āhuatanga ataata – te taurite, te reretau, te manawataki, te renarena, te wana, te papamua, te papamuri
- He rautaki hopu whakaahua – te rohe ngangahu, te puare, te huranga kōpani, te tirohanga, te tāparepare, te whakarehurehu, te puna tūrama, te ahunga tūrama, te kounga tūrama
- Ngā tikanga hopu whakaahua – he mea whakarite, māori rānei, he rārangi ārahi, te ture hautoru, te aronga nui
- Te kaupapa o te whakaahua – ana kōrero, tōna tikanga, tōna tohutanga

Ko tā ō kupu āwhina i te whakawākanga tuatahi, he tautoko i te ākongā ki te whakarite mahere hopu whakaahua tuarua; he urupare tēnei ki ngā ariā i puta ai i te Ngohe 1: He Rangahau. Ka hopukia ngā whakaaro hei tuhipoka, hei huahua hangariki hoki/rānei. Tuhia he rārangi whakaaro, rautaki hoki, mō te hopu whakaahua whai muri. Ka pēhea te whakapai ake i ngā whakaahua 40 whai muri? Hopukia ngā whakaahua 40 tuarua.

6. **Mā te ākongā e kōwhiri āna whakaahua e 9 pai rawa, hei tuku ki a koe.** Me poro? Me whakapai ake i te hā? Mā te wānanga ā-rōpū iti, e kōwhiria ai te whakaahua pai rawa atu (he kāhui takirua, takitoru rānei) hei whakaatu.
7. **Kei te pai mehemea e hiahia ana te ākongā ki te tuhi kōrero mō te whakaahua me te take e whakanuia ai taua mea.** Kei te pai tonu te pōhiri i te whānau ki te whakaaturanga.

Ngā Rauemi: Resources

[‘Concepts to understand’](#), New Zealand Intellectual Property Office

[‘A tiki tour of our heritage’](#), New Zealand Herald

[‘Tiki: more than decor – a symbol’](#), New Zealand Art Print News

[Photography Analysis Resource Sheet](#), Arts Online Te Hāpori o Ngā Toi

[‘Aimee Ratana’](#), Auckland Art Gallery Toi o Tāmaki

[‘Cultural analysis of Emotiki app and why it could be offensive’](#),
Karaitiana Taiuru

[‘Hei Tiki: He Whakamārama Hōu’](#) (Tuhinga roa tāhū paerua),
Dougal Rex Austin

[Te Hei Tiki: An Enduring Treasure in a Cultural Continuum](#)
(he whārangi tauira), Dougal Austin

[Plastic Māori](#), The Dowse Art Museum

[‘Synthetic/Authentic? Plastic Maori’](#), The Dowse Art Museum

[‘Plastic Māori: Ngā tuakiri hōu – new Māori identities’](#), Te Ara

[‘Week 2 Task: Wayne Youle: Often Liked, Occasionally Beaten’](#),
KDOESCONVERSATION

[‘Conversations In Creative Cultures’](#), Grace Scott-Hewitt

Poukapa Aromatawai	Taumata Marautanga: 5	Ngā Whāinga Paetae: CI, DI, UC, PK
--------------------	-----------------------	------------------------------------

Taunaki Ako:	Tūāpapa	Matatau	Ringarehe
Whakawhiti kōrero, kimi tikanga	Kua tīmata te ākonga ki te whakataurite, ki te whakatairite i ngā huarahi huhua e whakamahia ai i roto i ngā hātepe mahi toi, hei kawē i ngā kōrero mō ētahi mea, mō ētahi ata.	Kei te mōhio te ākonga ki te whakawhiti whakaaro mō ngā hātepe mahi toi; kei te mōhio ia ki te whakamahi i te ataata whai tohu, i te mea, i te whakaahua.	Kei te mōhio te ākonga ki te whakaputa i te mahi toi hou tonu e kawē nei i ngā ariā whaitake, i ngā hātepe mahi toi e whakamahi ai i te ataata whai tohu, i ngā mea, i te whakaahua.
Whakawhanake ariā	Kua tāraihia e te ākonga ngā ariā hei urupare ki ngā take maha, tae atu ki te āta titiro ki ngā tikanga kua roa e ū ana ki te mahi toi.	Kua tāraihia, kua whakapaitia e te ākonga ngā ariā hei urupare ki ngā take maha, tae atu ki te āta titiro ki ngā tikanga kua roa e ū ana ki te mahi toi.	Kua tāraihia, kua whakapaitia e te ākonga ngā ariā hou tonu hei urupare ki ngā take maha, tae atu ki te āta titiro ki ngā tikanga kua roa e ū ana ki te mahi toi.
Whai māramatanga ki te toi ataata me tōna horopaki	Kei te tautohu te ākonga i ngā āhuatanga e hāngai ana ki te horopaki, ā, kua tīmata ia ki te tātari i te whanaungatanga i waenga i te whakaputa mahi toi, me te horopaki, me ōna pānga huhua.	Kei te tātari te ākonga i ngā āhuatanga e hāngai ana ki te horopaki, ā, kua tīmata ia ki te tātari i te whanaungatanga i waenga i te whakaputa mahi toi, me te horopaki, me ōna pānga huhua.	Kei te tātarihia, kei te uruparetia e te ākonga ngā āhuatanga e hāngai ana ki te horopaki, ā, kua tīmata ia ki te tātari i te whanaungatanga i waenga i te whakaputa mahi toi, me te horopaki, me ōna pānga huhua; ka whakaaturia te hononga ki te mahi a te ākonga mō Raupatu.

Arotake

Ka pēhea te arotake i te wāhanga nei. Mā te ākonga e arotake? Mā te kaiako?